

Au Meafaalogo

Se ta'iala aogā mo fanau ma o latou aiga ina ia malamalama
i le faaaogāina ma le tausia lelei o a latou meafaalogo

Manaia tele au meafaalogo fou!!

O le a faasino atu i lenei tusi le auala e faaaogā ai au meafaalogo, ma nisi o mea e ao ona e nofouta i ai i le tausia lelei o au meafaalogo.

Talosia e te fiafia i au meafaalogo fou!

O le tusi lenei mo:



Mataupu

Pe a ki ma tapē au meafaalogo	5
Pe a sulu au meafaalogo i lou taliga	6
Faatonutonu le malosī	10
Maa	11
Suiga o maa	13
Maa tuai	14
Le tausiga o au meafaalogo	15
Meafaalogo ma maa i le pō	18
Pusa faatonutonu	19
Le faagaau uga	22
Nisi fesoasoani mo au meafaalogo	23
Telefoni	26
Komepiuta ma meafaalogo	28
Meafaalogo ma fagafao	30
Mea tāua ia manatua	31
Fesoasoani aogā	35
Manatu	38

E manaia tele le iai o ni meafaalogo. E tāua lou iloa o le faaaogāina ma le tausiga o au meafaalogo. I itulau o loo sosoo mai, o le a matou faasino atu le auala e te faaaogāina ai, ina ia telē se aogā mo oe. O le a faailoa atu foi le auala e te tausia lelei ai au meafaalogo. E tataua ona e manatua, e lua vaega e ao ona tausia lelei, o le meafaalogo atoa, ma le tama'i mea lea e faamaulu i totonu o lou taliga (earmould poo pusa faatonutonu).

Pe a ki ma tapē au meafaalogo


O le auala e ki ma tapē ai au meafaalogo, e fuafua lava i le ituaiga lena o loo iā te oe. O le a faailoga atu e lau foma'i faapitoa o le faalogo faatonuga e tatau ona e mulimuli ai.

Pe a ki au meafaalogo, oomi le ki lapo'a i le itu o loo iai le mata'itusi M. Pe a tapē, ia oomi le ki lava lenā i le itu o loo iai le mata'itusi O.



Pe

Ki au meafaalogo e ala i le tapuni o le vaega o loo tuu ai le maa. Pe a tapē, ona toe tatala lea o le vaega o loo tuu ai le maa. E lelei le faiga lea, ina ia tapē ai le maa ma lē ma'imau ai pe afai e lē o faia au meafaalogo.



Pe a sulu au meafaalogo i lou taliga

E masani ona faigatā i le ulua'i taimi le faiga o au meafaalogo, ma atonu e te mana'omia ai se fesoasoani a ou mātua po o se faia'oga.



1. Manatua ia tapē lau meafaalogo i taimi uma a o le'i faamauluina.



2. Ia mautinoa ua tuusa'o le meafaalogo taumatau i lou taliga taumatau (atonu o loo pipii ai le pepa mūmū) ma le meafaalogo agavale i lou taliga agavale (atonu o loo pipii ai le pepa lanu moana).



3. Faatulaga le pusa faatonutonu i luga o lou taliga.

4. A faigata ona faaofi lau pusa faatonutonu i lou taliga, tuu atu i ou mātua po o lou faia'oga na te faaofiina.





5. Pe a taatia lelei le pusa faatonutonu i lona tulaga, ona ta'i mai lea o lau meafaalogo e faau mai tua o lou taliga.

6. Ki le meafaalogo.



7. Sauni loa e faalogologo.




Ia manatua e tapē au meafaalogo a o le'i se'i ese mai ou taliga. Afai e galo, e te ono faalogoina se leo pasi.




Faatonutonu le malosi

Atonu e iai se ki i au meafaalogo e faatonutonu ai le malosi. E mafai ona sui le malosi o le meafaalogo pe a e fetuuna'i le ki lena. Pe a una'i i luga ona leotele lea o le malosi, ae a una'i i lalo ona laitiiti lea o le malosi. Ia faamautinoa e faatulaga lelei le ki i le mea na iai pe a uma ona fetuuna'i le malosi o lau meafaalogo. Atonu e tapē e lau foma'i faapitoa o le faalogo le malosi o le leo ina ia aua ai ne'i e toe fetuuna'ia. Afai ua tapē, lona uiga e tusa pe e te fetuuna'i solo le ki, ae lē toe suia ai lava le malosi o le leo ua iai lau meafaalogo.



Maa



E māfua ona ola au meafaalogo ona o maa o loo iai. Lona uiga e tāua tele lou tausia lelei o maa ma ia fai ma sui pe a mana'omia.

E masani lava, ona 5 i le 15 aso le umi e malosi ai maa o le meafaalogo, peita'i e fuafua lava i au meafaalogo. E lelei pe a e fesili atu i lau foma'i faapitoa o le faalogo pe fia le umi e malosi ai maa a o le'i toe suia. Afai ua tau umi ni masina talu ona e faaogāina meafaalogo, o inā foi o le a e iloa lelei ai le umi e mafai ona malosi ai maa o au meafaalogo!

Pe a faasolo ina uma le malosi o au maa, atonu o le a e faalogoina se 'i'i i au meafaalogo po o se leo 'ū'ū e faailoa mai ai ia te oe. Lona uiga ua tataua ona sui maa. Afai e te lē utagia, o le a oo ina pē atoa le meafaalogo ma lē toe aogā. Ia ta'u atu i se tagata matua pe a oo i le taimi ua tataua ona sui ai maa, ina ia latou faasino ane ia te oe le auala e sui ai.




E lelei pe a aumai nisi au maa faaleoleo i le a'oga pe e te alu foi i se malaga, ina ne'i uma le malosi o au maa o loo faaaogā. E manaia foi pe afai o loo maua mai i lou faia'oga i le a'oga nisi maa mo oe. E tatau foi ona iloa lelei e oe, o ou mātua, ma lou faia'oga, le tetelē o maa o loo faaaogā mo au meafaalogo, ina ia sa'o i taimi uma le tetelē o maa e te su'ea mo au meafaalogo, pe afai o loo e alu mamao ese atu i se isi mea mai le a'oga po o lou aiga.

E lelei pe a tusi iinei le lapopo'a o maa e te faaaogā:

Suiga o maa

Pe a sui le maa o lau meafaalogo, tatala le vaega e tuu ai le maa ma aveese mai le maa lea ua pē. Tuu atu i ai le maa fou, ae manatua ia sasae ese muamua le pepa o loo pipii ai. Afai e lē mafai ona e toe tapunia lelei le vaega o loo iai le maa, taumafai e toe fetuuna'i le taatia a le maa, atonu pe toe feud'i. Afai e te lē iloa tatala le vaega lea e tuu ai le maa, fesili atu i lou faia'oga po o ou mātua foi.



Maa tuai

Aua le faataatitia solo maa tuai ua lē toe aogā, ina ne'i fefiloi faatasi ma au maa fou. Ia tia'i ese au maa leaga ua lē toe aogā pe a uma ona sui. Avatu i ou mātua, lou faia'oga po o lau foma'i faapitoa o le faalogo - e latou te iloa le auala e matuā tia'i lelei ai na maa leaga. Aua le tuua maa tuai e fai ai au taaloga, e ono fia iloa e ou tei laiti po o au fagafao foi po o ā nei mea, ma i'u ai ina tuu i o latou gutu - e telē le lamatiaga i lenei mea!



Le tausiga o au meafaalogo

E tāua tele ona manatua, ia aua lava ne'i tuuina au meafaalogo i totonu o se vai, ona e iai ona vaega e mafai ona apo e le uila ma sipaka ai.



E mafai ona fai pe a e alu i le matafaga, ae aua lava ne'i faia pe a e ta'ele i le sami.



E lē tatau foi ona faia pe a e ta'ele i totonu o se faleta'ele.



E lē afaina le fai a o tau timutimu laitiiti - ae lē tatau pe afai ua matuā tetele ni timuga - se'i vaganā o iai sou faamalu po o sou ofu faatimu o mafai ona malu ai.

E lē mafai ona e fufuluina au meafaalogo i se vai; na o sina fasi ie vaivai e avane e solo mamā ai. E mafai foi ona e faaaogā se tama'i pulumu vaivai, po o se pulumu fulunifo e vaivai nifo ma o loo mago. Talu ai le faaaogā soo o au meafaalogo, atonu e oo ina palapalā nisi o patu o loo ki ai au meafaalogo. E tatau foi ona faamamā na mea i se fasi ie po o se pulumu. Afai e lē tausia mamā na mea, e i'u ina pipii ai ma malō le pefu se'ia oo ina leaga ai. E mafai foi ona e maua mai i lau foma'i faapitoa o le faalogo se pulumu e faapitoa lava mo le fufuluina o meafaalogo.



Afai e pa'ū le meafaalogo, e mafai ona ta'e pe leaga foi. E lelei pe a faataatia lelei i luga o se mea mafolafola ae vaivai e faamamā ai - e pei o se fasi ie o loo fofola i luga o se laulau.




Afai ua matuā vevela au meafaalogo ona ua umi ona lāina, pe susū i le sau po o lou afu, e lelei la ona tuu i totonu o se pusa faapitoa e faamago ai i le pō atoa. O se pusa faapena e mafai ona toe aveesea le susū o loo i meafaalogo. E mafai e oe ma ou mātua ona fesili atu i le foma'i faapitoa o le faalogo e ta'u ane nisi faamatalaga e uiga i lena pusa ma le auala e faaaogā ai.



Meafaalogo ma maa i le pō

E mana'omia foi ona faamālōlō au meafaalogo ma ona maa e pei foi ona e mālōlō oe. E tatau ona tuu ese au meafaalogo i le pō pe a e moe. Ina ia mautinoa o le a lelei au meafaalogo ma malosi ona maa mo le faaaogāina i le isi aso o sosoo mai, e lelei ona matuā faamatala i le pō atoa le vaega lea e tuu ai le maa; e lē mana'omia fua ona tau ave ese maa. Afai ua tau ova le susū o meafaalogo ona o le afu, e lelei pe a tuu i totonu o le pusa faapitoa lea e faamago ai, mo le pō atoa. Afai e te iloa e ono lua pe sili atu ni aso o le a lē faaaogāina ai au meafaalogo, e tatau la ona ave ese i fafo maa.



Pusa faatonutonu (Earmoulds)

Ua faia faapitoa lau pusa faatonutonu mo oe - e faia e le foma'i faapitoa o le faalogo i lona potu foma'i pe i le falema'i tele. E aogā le pusa faatonutonu ma le faagaau ina ia faaoo maia le leo i lou taliga. Afai e leai se pusa faatonutonu, e lē mafai e le meafaalogo ona faaoo mai se leo i lou taliga.



E tatau ona fai ma sui le pusa faatonutonu, auā a o faasolo ina e matua, e faapena foi ona faasolo ina lapopo'a ou taliga - ae lē suia ai le tetelē o pusa faatonutonu. Lona uiga e lē toe faigofie ona faaofi i ou taliga, ma ua mana'omia ai nisi pusa fou.



E tāua tele le fetai lelei o le pusa faatonutonu i lou taliga.
Afai o tigā lou taliga pe a faaofi le pusa faatonutonu, ia ta'u
atu i ou mātua po o lou faia'oga.



E tāua tele le mamā o au pusa faatonutonu i taimi uma. E lē tutusa mea o loo gaosia ai mai mea o loo gaosi ai meafaalogo, ma e lē o iai ni mea faaeletise - e lē afaina la pe a susū. O se faiga lelei pe a fufulu i se vai mafanafana ua tuu i ai se fasimoli, ia faatasi i le vaiaso, pe fufulu soo pe a vave ona palapalā.

Afai ua e fufuluua pusa faatonutonu, e tāua tele ona toe faamago lelei. E tataua lava ona matuā mago lelei a o le'i toe faapipiia i au meafaalogo. E mafai ona faaaogā se fasi ie e solo faamago ai le pito i fafo o le pusa faatonutonu. E mafai ona faamago le pito i totonu, e ala i le feula i fafo o le vai mai le faagaau. Aua e te faaaogāina lou gutu e feula faamago ai pusa faatonutonu, auā o le ea lena e sau mai lou gutu e susū, ma e lē mago ai pusa faatonutonu. Ae faaaogā pea le mea patino e feula ai le pusa faatonutonu, lea e alu atu ai le ea mago i totonu o le faagaau ma aveesea i fafo le ea susū. E mafai ona e maua mai lau foma'i faapitoa o le faalogo se mea e feula ai le pusa faatonutonu.



Le faagaau uga

O se faagaau uga o loo taatia i le va o le meafaalogo ma le pusa faatonutonu, o loo faamautinoaina le taunuu lelei o le leo i lou taliga. E tāua la le tausia lelei o lena faagaau. E tatau ona sui faalua i le tausaga pe ina ua malo, ua matafi le lanu, pe ua lē faigofie ona lolo'u. Afai ua tuai po ua malō le faagaau, o le a lē lelei foi se leo e te maua mai lau meafaalogo.



O faagaau lelei e mafai ona lolo'u



O faagaau tuai e mana'omia ona sui pe a malō po ua matafi foi le lanu



E mafai ona tou asiasi atu ma ou mātua i lau foma'i faapitoa o le faalogo ina ia sui le faagaau. E lelei lena auā o loo iai lana meafaigaluega sa'o mo le faia o lena mea - ae lē faaleagaina ai lau meafaalogo po o au pusa faatonutonu.

Nisi fesoasoani mo au meafaalogo

Atonu e mafai ona e faaaogā se isi mea faaopoopo e faapipii atu i au meafaalogo ina ia faaleleia atili lau faalogo pe afai o loo e iai i se nofoaga pisapisaō pe o e mamao ese mai le tagata o loo tautala. O lenei mea faaopoopo o se vaega o le mea ua ta'ua o le FM. O le fuafuaga o le FM ina ia mafai ona faalatalata maia ni leo o loo mamao ese, e pei o lou faia'oga pe a mamao ese le mea o loo tautala mai ai. E fesoasoani foi i lau faalogo pe afai o loo pisapisaō se mea, e pei o totonu o se fale'aiga, i se pati o se aso fanau po o totonu o le potu d'oga o loo pisa ai tamaiti.



O le vaega o le FM lea e palaka i le pito i lalo o au meafaalogo, e ta'ua o le FM receiver. E mafai ona e faapipii sa'o atu le receiver i lau meafaalogo pe faaaogā se fagamaa (adapter).



Meafaalogo ma le FM receiver

O le a maua e le FM receiver ni leo e momoli mai i ai e le maikorofoni FM. O lenei maikorofoni faapitoa e mafai ona faamaulu e lou faia'oga po o sou matua, po o le faataatia foi o le maikorofoni i luga o se laulau.

O le a aumai sa'o e le FM receiver leo mai le maikorofoni ma tuu atu i lou taliga. E pei lava o lena ua tautala sa'o atu lou faia'oga i lou taliga!



Meafaalogo ma le FM receiver



Meafaalogo ma le fagamaa FM ma le receiver

O nisi nei o maikorofoni FM mo
oe. E lē faapenei uma foliga o
maikorofoni - atonu e ese se
maikorofoni na e vaai i ai, e lē o
faaalua atu i inei.





Telefoni

E mafai ona e faalogo atu ma talanoa i le telefoni a o faamaulu au meafalogo. Afai e te lagona se leo 'i'i, taumafai e sui le auala e uu ai le telefoni, pe fesuia'i taliga e tuu i ai le telefoni, ma le taliga mo au meafaalogo, ona toe alu ese lea o le leo. O nisi meafaalogo e iai se vaega faapitoa i totonu e ta'ua o le telecoil lea e faigofie ai ona lagona le telefoni. Afai o loo faailoga lau meafaalogo i le mata'itusi T (T mo le telecoil), ona ki lea i ai i le T ma faaaogā le telefoni. Pe a uma ona faaaogā lau telefoni, ia faamautinoa e toe mimilo le ki i le mata'itusi M (M mo le microphone). Afai e lē faia, e ono peiseai ai ua lē o toe ola au meafaalogo, pe e te lagona foi se leo pasī. Ae afai e toe tuu le ki i le mata'itusi M, ona toe sologa lelei lava lea e pei o le mea masani.





Afai e te talanoa i se telefoni feavea'i a o fai au meafaalogo, e te ono faalogoina sina leo pisapisaō - ae lē o telefoni feavea'i uma e tupu ai lenei mea. O nisi taimi e ono tupu lena mea pe afai o loo e saofa'i latalata i se tasi o loo ia faaaogāina se telefoni feavea'i. E lē faapea la e iai se mea o faalētonu i au meafaalogo - aua e te popole! Talanoa atu i lau foma'i faapitoa o le faalogo pe afai ua e lagonaina le tele o ni leo oolo a o faaaogā le telefoni feavea'i.

Komepiuta ma meafaalogo

E lē tatau ona iai se faalētonu pe a fai au meafaalogo ma faaaogā le komepiuta. Peita'i, afai o ki au meafaalogo i le pito o loo iai le mata'itusi T po o le MT (telecoil), e te ono faalogoina se leo sisī pe a tau latalata lou ulu i le fa'ata o le komepiuta. E lē faapea ai ua lē o lelei au meafaalogo - na pau lava le mea e fai, o le ki o au meafaalogo i le pito o loo maka ai le mata'itusi M ona toe uma lea o le leo oolo.





Afai e te fia faalogologo i CD ma isi polokalame e iai leo i lau komepiuta, e mafai ona e faaaogā le vaega o loo ta'ua o le Direct Input nai lo le faamaulu o headphones ae tuu ese ai au meafaalogo. E mafai ona faaaogā se uaea e palaka le isi ona pito i le vaega i fafo o le komepiuta lea e sulu i ai le headphone a o le isi pito e palaka atu i au meafaalogo. E lelei pe a maua mai i lau foma'i faapitoa o le faalogo le uaea ma se tama'i fagamaa mo lau meafaalogo. O le a ta'u ane ia te oe e lau foma'i faapitoa o le faalogo le tele o isi mea ma faali ane le auala e aogā ai lenei mea i au meafaalogo.

Meafaalogo ma fagafao

E tusa lava pe uō mamae oulua ma sau fagafao e pei o se maile po o se pusi, ae lē faapea ai ua uō mamae lena fagafao ma au meafaalogo.

E masani lava ona fia iloa e maile ma pusi meafaalogo - aemaise pe afai e taatitia meafaalogo ae o loo ola pea le leo, i luga o se laulau po o se fata. Afai lava o le a faatetele le fia iloa o nei meaola, e i'u lava ina lamu pe 'ai loa le meafaalogo. E tāua tele ai ona teu lelei au meafaalogo i se nofoaga e mamao ese mai fagafao!



Mea tāua ia manatua

O au meafaalogo ua pei o se tama'i komepiuta ma e tāua tele ona tausī lelei ina ia umi pea ona aogā. O le lisi la lenei o mea ua matou manatu e tatau lava ona e manatua mo le tausīa o au meafaalogo.



1. O maa ma meafaalogo e lē o ni taumafa; e lē tatau la ona tuuina i lou gutu!

2. Pe a e ta'ele pe 'au'au i le sami, ia tatala ese au meafaalogo auā e lē mafai ona faasusūina.



3. Aua ne'i e faataaloina au fagafao i au meafaalogo, ina ne'i o latou 'aina meafaalogo!



4. Afai e te saofa'i latalata i se afi, ia faamautinoa ua tatala ma tuu mamao ese au meafaalogo ina ne'i velasia!






5. Na o oe lava e faaaogāina au meafaalogo; aua ne'i e faata'ita'ia fua i taliga o au uō!




6. E mafai ona tala ta'itasi meataalo a tamaiti ma paso, ae lē mafai ona tala faapena meafaalogo!



7. Ia mautinoa e lē o faia au meafaalogo i le taimi o loo faamago ai lou ulu i se masini faamago po o faapasī le hairspray i lou ulu!

8. E tatau lava a itiiti mai e faatasi i le vaiaso ona faamamā au meafaalogo.



Fesoasoani Aogā

O nisi taimi e foliga mai e lē o tutusa le aogā o au meafaalogo ma le tulaga sa e faatalitalia. O nisi la nei o fesoasoani aogā i ni mea e mafai e oe, ou mātua po o lou faia'oga, ona siaki a o le'i toe sa'ili atu i lau foma'i faapitoa o le faalogo mo se fesoasoani.

Afai e te lē o lagonaina se leo i lau meafaalogo, taumafai e:

- ☆ Mimilo le ki o le meafaalogo i le itu o loo iai le mata'itusi M (mo le maikorofoni)
- ☆ Siaki po o lelei ona faamau le pusa lea e fafao ai le maa
- ☆ Ki i luga le malosi e te lagonaina ai mea
- ☆ Sui se maa fou - ma ia faamautinoa o loo sa'o ona fafao
- ☆ Faamamā le pusa faatonutonu




Afai e ūū le leo o au meafaalogo, taumafai e:


☆ Faamamā le pusa faatonutonu ona toe faamaulu lea o le pusa ma le meafaalogo

☆ Alu se'i siaki e lau foma'i le kanale o lou taliga

☆ Sui se isi pusa fou faatonutonu

☆ Tuutuu i lalo le malosi (e na o sina taimi lē tumau e aogā ai lena faiga)





Afai e te lagonaina ni leo pei e oolo, taumafai e:

- ☆ Ta'u i ou mātua po o le faia'oga ina ia vave ona siaki le meafaalogo
- ☆ Faamautinoa o loo faatulaga le meafaalogo i le M - o le faailoga mo le maikorofoni
- ☆ Sui se maa fou - ma ia sa'o lelei ona fafao le maa

Afai e lē o faaleleia lava le faafitauli, e tataua ia te oe ma ou mātua ona fesili atu i lau foma'i faapitoa o le faalogo po o le foma'i ina ia toe siaki au meafaalogo.



People first



E iai lo matou talitonuga, e tele atu isi mea e mana'omia mo le mauaina o ni meafaigaluega e sili ona lelei mo le faalogo, nai lo le faalagolago i le atamai faanonaponei. O le pogai lena ua matou faamuamua ai mana'oga ta'itasi o tagata uma o loo faalētonu le faalogo, a o matou taumafai e saili pea mo nisi vaifofo fou auā le faaleleia atili o le faalogo.

Ua faatupeina e le Oticon Foundation